



Selasa, 7 Januari 2025
Ogen: MATIUS 2:16-18



“Sora Nderkuh Dingen Tangis”



Tangis ras ngandung e me salah sada cara mengekspresikan duka. Lit memang kalah ban riahna pe ukurna naktak iluhna, tapi labo ikut ras sora nderkuhna. Sora nderkuh nuduhken uga bagesna ceda ate si inanami sekalak jelma bas pusuhna. Engkai maka banci kalak nderkuh seh gangna? E perbahan i bas alam la sadarna, iakapna maka penampat e seh dauhna, seh maka lit dorongen i bas dirina jine guna nderkuh, ntah mawen lit simegiken ras ngangkai isi pusuhna. Labo erpilihan subuk dilaki ras diberu, ceda ate si mbages banci erbahanca jelma serko, ngatakenca ia butuh penampat, mulahi ia bas picetna nari. Pembunuchen anak-anak i Bethlehem, kenca ibegi Herodes maka nggo tubuh i je sekalak mesias, lanai ralang-alang mahanca mbue keluarga lit i bas kebiaren ras ceda ate. Kerina danak-danak iteruh 2 tahun, i bas paksana ia tuhu-tuhu badia denga, meriah denga iakap orangtua ngangkip-ngangkipsa, arus ibuat paksa, gelah ibunuh. Iandingken kecedan ate e desken ceda ate Rahel ngandung anakna. Rahel e nande Jusuf, ndehara siikelengi Jakup (Kej.30). Ia ndekah maka dat pupus, kenca tubuh Jusuf, meriah kal ukurna. Tapi la ndekahsa kenca Jusuf remaja, cian ate senina-seninana bana, maka banna Jusuf lanai bas rumah bapana, idayaken jadi juak-juak bangsa asing, tapi ikataken maka ia nggo ipan binatang buas. Tentuna Rahel labo ngasup ngalokenca, la lit penghiburen si banci nalihkan kecedan ate kepaten anak. I bas pembantaian anak kitik siilakoken Herodes jumlahna belasan ribu jiwa. Bage ka buena sora nderkuh pernanden e, iadep-adepenna anakna i genosida. Tangis ia, tempa malem ka ukurna. Tangiskenlah adi lit memang ceda atendu, tapi tangislah bas toto, turiken man Tuhan isina sora nderkuh e. Iluh si mambur i bas toto, sora nderkuh bangsa Tuhan, la banci la iperdiatenna. Tangis e ngataken kita la megegeh ngalaken perbeben ras aru ate. Lanai terbelasken alu kata-kata, arah tangis nari ngenca kita nuriken ate ceda. Situhuna bas lanai terturiken e, Tuhan meteh isi pusuhta si mbagesna kal pe. Arah iluh e, iapuli Tuhan pusuhndu.